

心

知

堂

詩

稿

心知堂詩稿卷十六

成都汪仲洋少海

渡江集下

起己卯七月迄庚辰十月杭州及官山陰時作

題李海鵬大令海上釣鼈圖

男兒生有磊落抑鬱之奇氣睥睨人間不稱意往往癡
情絕古今飄飄逸想出天地韓非善說逆龍鱗莊周妙
解大鵬背聞道徐陵本麟精傳言郭璞是鼉魅言若鑿
空義眞實跡雖怪誕理平易而况老子騎牛西出關君
家從此多故事長爪乘虬恣汗漫宮袍捉月逞狡獪習
之親受驅鱷方玉溪遙作掣鯨替羞蒙門戶踵前轍奮
拔旌旗成一隊派啟歐蘇衍薪傳才兼仙鬼不獺祭等

身著述隨人讀此圖蒼茫見君志自從女媧斷鼇足海
水清淺今幾次仙路輒苦三山迷颶風由來此物崇琴
高志趣巖陵心龍伯手段礮溪伎釣竿穩壓風濤平釣
芒銳駭蛟龍避長引六鼇頭出水盡使羣仙立聯袂才
雄能令神物馴量大自覺天池隘萬古心曾借開拓我
亦馳情九州外

苦旱

垂龍鞭不起田稻欲蒿眸山雨幾時到海風吹滿樓江
聞前日斷湖記去年游六井誰疏鑿千家吸早秋

八月初六日鄉試入闈予以候補人員不考而充

內簾官感賦二首

取士當求真任官先務得大賢苦用心世人固不識文
章在根抵科第非畛域試平棄取心何論有無職破格
違衆議過信準疇昔謂中丞陳望坡先生從古知遇感不在攀援力
用才心本公受任理自直何來遽集斯諒無腐鼠嚇
我本孤寒人生長蜀西鄙辛苦博一科從此離桑梓北
出劍門道東下瞿塘水心平忘地險動輒數千里前後
十七年過夏長安市緇塵雜涕淚衣浣猶未洗守茲痛
苦心推作仁恕理下以求真才上以報知己

閩中呈諸試官

簾內十五人才望喧衆口夜郎齒最少

黎雪樓貴州人

吳儉科稱

久

李錦莊江西人

咏馬曹唐病

曹秋農于閩中抱病

還山張果壽

張南塘年最老時有引退之志

葉

公不好龍

葉少虞

劉伶但飲酒

劉雨溪

崔駟有史才

崔香南

鍾

繇真書手

鍾雲亭

滇南孔范偕

孔范

齊東耿王偶

耿王

咄

哉揚子雲名籍落江右

揚南

別有回先生

呂月

爰及柱

下叟

李海帆

交早情尤篤風義兼師友指數何磊落才非

一州有蓉鏡磨無翳玉尺量不苟會稽有竹箭十應得

其九而我胡爲者俚俚從諸後淮陰驅市人景宗笑新

婦豈惟膽氣怯亦頗顏色忸願各資所長毋徒忘其醜

庶幾叨末光不致負官守

校試訖率成長句六首

風簷六度憶長安下第人今作試官五色定知誰賦日

一軍都訝此登壇

浙省候補人員向無人簾者

揀金意切披沙細獻玉情

殷識璞難紅葉打牕紛似雨可能迴眼作花看

也借湖光洗眼頻麤官時復走風塵游強李白尋天姥

今夏以公事干役
台州過天姥山

宰愧嚴陵攝富春

去秋惜
黎相廬

百里花栽初試手

千山雲裏暫抽身誰知判牒餘鉛槧反對朱衣點勘真

使星如月照杭州鑠院平分兩浙秋山斗文章推吏部

大主考王省崖少司
寇由吏部遷今職

神仙學士住瀛洲

副主考伍
雲卿太史

權衡合併東

西舍器識誰分上下樓恐有遺珠沈海底不妨珊瑚網再

冥搜

主考將房中遺卷搜閱
一過云無仕卷可拔

雪棧巉天一綫開籌邊人記入川來曾從幕府參書局

甲戌監臨中丞以方伯總裁
四川通志年時分修在局

更作衙官試吏才汝水似聞新月

吳諫華太守暨河蘇關宜祥亭兩
大令于中丞前有學問尚好之譽

梁園還憶舊鄒枚龍門百尺

慙知遇忍使神魚漫暴腮

斲輪終要運斤風點筆何人有化工園圃不窺帷左右

內收掌董怡園副守

蓮花惟愛浙西東

內監試周嶺山副守宣浙二十餘年矣

科名老輩頭

俱白風雨深宵燭正紅畢竟升沈關命數文章還比信

天翁

煎茶試院月初圓十六冰簾夜悄然元愷數符應報國
宰官身現爲推賢雲梯有路登須捷寶筏何人渡最先
明日榜花開五色霓裳隊裏看羣仙

以闌中所作就正於海帆月滄兩人意殊不合仍

作長句解之

我聞孔氏門中各得性所適師也自過商不及趙宋之

朝有二程明道伊川不相襲春風和藹非圓融介石堅
貞豈固執又聞兵家者言廟勝策漢有李廣程不識逮
唐再造收山河汾陽臨淮才相敵苦樂如聞刁斗聲寬
嚴但辨旌旗色詩亦從古分逕庭雅頌以還疇善鳴雄
奇平淡任所適清新俊逸誰能程千言易辦一字窘往
往撚斷須數莖杜律曾矜老去細韓才自詡生來橫神
明變化無不可自然古調流新聲昔者子桓論通徹文
章好醜惟吾名瑕疵摘盡光芒出後世寧知誰所更我
師此意恃二友如風走筆無畱停傳箋遞送復面質乃
如講學與論兵呂子守正推敲精一字未安全力爭李
子尚通議論平大段已得無糾繩二子相持不能決賓

禮主擇尤無憑成材藉李意差幸直道感呂心自驚安
得周旋日左右慰勉交至成吾能藥石溫寒妙調劑會
見轉丹爐火青

山陰縣試童生作

珊瑚網搜海底得不在多少玉尺操人間用豈關大小我
有文字緣種遍科名草今年太僥倖三度抒懷抱前者

宮槐黃破格備同考鑲院三十日衣鉢暗傳巧

余舉于辛酉第三

今秋房薦首卷錢生

昨者嶺梅白捧檄來江表觀風五百人

稱贊有耆老

觀風應試五百餘人紳耆徐壁堂先生年九十矣謂其二

也自是以來七十年中

今茲值縣試扁門及歲杪越州多舊家

學業世探討童子不待冠聰明類了了亦有三數人名

場鬢鬚皓斐然一千卷堆案恣品藻恍與蘭亭遊如上

山陰道千巖萬壑間何處置身好邦人盡義獻縣尹殊

統寶

江統下書皆晉時山陰令

點勘筆未下振觸心如擣憶我成童時

枵腹學未飽誰知令宰賢使我遭逢早時賦錦江漲長

歌自屬藁筆下蛟龍蟠紙上波濤森前生李太白聲名

遂矯矯

成都令徐海帆夫子覆試日於四書文外命作錦江觀漲詩余作長歌三首七律四首拔筆立就大加賞異謂爲太白後身

比來二十年空有瓣香禱科名與著述不堪回首掉負

薦遜鵬鶚相士覓驥襄州宅近蓬萊宰官餘懊惱舊日

青雲梯空際立未倒勗汝聯袂登快我雙目瞭

題周實夫通守泰山一覽圖

人生不如李太白散髮騎鯨游入極亦當竟學蘇長公

茫茫東海攜袖中笑我不類蓬蒿者年年出棧跨老馬
衝雲踏雪奇氣出題名不顧人間罵疎狂結習殊僂僂
身與功名難飛騰齊魯道中空望嶽誰令不登同杜陵
二十年來悔不及夢裏往往攀峻嶒君從何處得粉本
壓倒嵩華氣象穩君從何日登泰岱眼光直到九州外
雲煙詖蕩天門開不是飛仙誰敢來如何墜書謝家小
翻身仍從天外回天上歸來曾襟大更無長物只此畫
去年相逢杭州城南問姓名已驚怪誦我褒中題壁詩
道是尊翁賞之最兩世知己我不知此畫著手殊難題
攜上秦望望鄉國南棧北棧羣山低感嘆意雜語重沓
并借君圖成我詩

吳兼山通守

名嫌江蘇常熟人

和校士首章韻見寄次韻答

之

下筆爭求一字安文猶如此況當官思從宦海修仙業
敢竊詞鋒逞將壇科第取才原未易簿書言治亦殊難
橋邊孺子師黃石欲借陰符爲展看

題畢埜香藩貳秀墅山莊圖

一住栽眉一浣津天涯憐我復憐君游來宦轍年相若
雅有鄉愁路不分索句詎知同里客披圖驚見故山雲
思持尺幅煩餘瀋黃海烏聊備舊聞

埜香與予皆徽籍此圖即其老屋在後者也

題王竹嶼通守夕陽春影圖

世間恨事那有此東坡未老朝雲死帷帳塵生長簾空

八
矢
言
和
卷
十
六
春光瞥眼如流水春光如水去不回水上桃花千樹開
紅影飄零夕陽夕絕似倩女魂歸來多情才子情無奈
尺幅生綃倩人畫新詩十首序一篇心傷腸斷筆偏快
桃葉墜去桃根孤專房夜夜竟何如祝他良宵夢燕日
令我錯寫弄麝書

宋棣生夫子自豫章來訪見賜二詩次韻奉答

往日唐球未有名詩瓢落拓錦官城登龍頓識門牆大
附驥羣推姓氏清故事凌雲同載酒新詞脫手自調笙
東園話別餘題贈七載開河無限情

蓬萊山下小諸侯自顧何堪住越州蘭渚鏡湖餘舊雨
絳帷鳩杖待佳游人間聚散真如夢宦海浮沈未是愁

却怪西興垂柳樹長條不綰渡江舟

山陰感事

渡江帆指越王城管領蘭亭快此行霸國山川餘富庶
書生經濟是廉明操持豈在風裁峻剖決還期法意平
閘斷海潮無濁漲使君心比鏡湖清

撫字催科兩未能彈琴無暇但披星頻將案牘編功課
偶借文章瀰性靈儘有侯芭勤問字何妨費直暫談經
衙齋本帶林泉氣牆外龍山一角青

李代桃僵亦是因南山鐵案豈同論覆盆冤獄難成讞
漏網奸兇果有人盡解牽連歸故里可憐溫飽變奇貧
平反却少高堂問手訂爰書暗愴神

會稽民人陳孝被湯身死野墳之側傍有白菜數株

而陳阿十之菜田有血跡焉遂坐阿十之罪阿十之父呼
冤上控發山陰上虞兩縣會審別得正冤而阿十出獄

蓮花色褪藕絲長尚有佳名占水鄉忽奮鼠牙成狴犴
時舒鳩羽亂鴛鴦欺凌到鬼平叩墓怙侈頻年抗稅糧
老抱琵琶流萬里還愁餘韻播他方

土娼錢魯氏混名花下
藉華落色衰遂變計動

以獄詞傾陷富室而婦女之稍有姿色者往往爲其誘致雖其夫若父知
之有愾怒而不敢與理者左近義塚旣皆平削又強侵沈氏之塋毀其楹
樞以爲園地前任以其婦女碍難資辦而氏愈橫不
可制余乃請于大府照究惡棍徒置于不赦之律

劉寵江頭控錦韉馬臻湖上挂蒲鞭縱無水利開千古
應愛廉名凜一錢田鼠貪饞寧我顧井蛙嗔怒爲誰遷
陶鎔氣質君須記但佩條韋莫佩弦

射退胥潮五百年浙東滄海變桑田煎鹽地熟栽香稻
牧馬場空種木棉積潦西流成倒灌長堤無用忽中穿

宣防越俎籌隣國水利相關要萬全

蕭山新林塘外爲龜地
龜地之外爲牧場皆潮

漲沙壅所成其勢外高內下近旣墾爲田畝而積水乃從塘脚私泄今春
中丞陳望坡先生觀察陳心奮先生檄同勘履情形予曰牧地之外不洩
入海則龜地有隣壑之憂龜地之水不籌所蓄則官塘有決
堤之患堤決潮入則山會當其下游不惟蕭邑一隅之災也

乖龍生性懶于雲只愛驪珠不愛民燔市可憐蝦尾禿
投淵空惜虎頭眞高原戶口流亡早近水田園獄訟新
莫漫禱祠思感召復湖修閘是何人

野語齊東賦遂初翻然引疾不躊躕鄉心漫念田橫島
宦迹空慚賀監湖駑馬故應貪棧豆鴟鴞何事嚇鷄雛
無端枉唱歸來樂笑倒陶家五柳株

秋霖暴溢浦陽江水稻山菽一例荒河內貧民思汲黯
揚州刺史愛文鵞船頭笑看吏署笏門外驚聞人毀牆

露冕誰令驕蹇甚匆匆返旆忽郎當

亦有同心苦不多金焦只許對嵯峨相將砥柱凌空立
一任狂瀾撼地過骨鯁都從忠愛出面諛無奈赧慚何

炎威漸退秋涼轉好趁雲陰課晚禾

此爲上虞令
李海帆而作

縱處脂膏不潤身始知官職爲他人
心肝肯負當年熱面目還留故態真
惜少俸錢資族黨幸無昏暮愧君親
平生自問殊流俗半是耽吟半耐貧

王政從來只近情最難停當是平平
斯民直道猶存古循吏初心不爲名
似有桓溫問諸葛應無任尚笑班生
尋常襍被原安穩一出官衙夢更清

吏事回頭總灑然風塵受替作游仙
消閒杖履纔今日

管領湖山已一年禹穴有人爭兩地蘭亭初榻失真傳
茫茫考古多疑案却似當官未息肩

莫道災荒但減租蕭南十萬輟耕夫初憂旱虐稻梁槁
旋苦雨淫鴻雁呼散粟無須稱矯制料民可忍負公符
關心尚有流庸者灑淚江邊訴向隅

者亦求一律撫卹已
爲申請于方伯矣

彈章忠厚託微詞

聖主寬仁許量移強項有情仍祖餞脅肩相向更伊誰
敢云受諫無今日却願知非在異時五馬迴頭看執戟
登仙比喻略差池

寄子范四十韻

吾友唐子范才藝兼十人遇合不稱意潦倒迷天真往

者年初冠結社城南閨爛漫笑時輩孤詣求高文詩才

不苟露得意時一呻記詠支機石鑱下驚天孫

子范詠支機石有鑱

下吼風雷未許人間擊之句倚樓弄長笛按拍歌陽春喉吻肖衆響無窮

出清新眼光只數尺耳能爲之先拳捷學猴跳手足如

風搏隨意見瀟灑冥心如有神龍宮孫思邈堪輿楊救

貧生者不使死死若安九原貧人如有求自備車馬奔

勢豪不以禮堅臥難出門行詣真卓絕文故無俗塵不

第日窮蹙身窮氣乃伸曠達無不可耿介中有閑徒見

與物和豈知自命尊身是柳下惠婦有陳堂前童稚各

隨養締結在長安忽復返桑梓吳蜀路七千道遠消息

絕恍惚訛語傳不字矢貞節違議遭苦辛知心只明月

樓頭三十年

子范室人未有一生
惟有月知心之句

不意守死待門泊孝廉船

鴛鴦中歲合無復兒女憐洞房太奇絕痛哭成新婚比
緣故人召浮家客潁川潁川望蜀郡遠道猶綿綿杜老
攜妻孥未到浣花邊母以曠達懷狎侮任其天母以耿
介性褊急發無端憤激非氣骨契合殊攀援羣小自常
態當念太守賢春水泝三峽欲上白馬灘歸原是本計
家無負郭田去住籌得失均未是安全立足竟無地誰
言天宇寬長歌祇當哭招汝未死魂

石敦夫

同福

山陰道上圖

我生山水窟性與山水狎北走斜谷棧東下瞿塘峽晝

喜煙雲活夜夢峰巒壓有如逢奇兵旌旆天外插五色
驚瑣麗瞪目不交睫又如游五都珍奇互雜還陸離不
知名欲買氣先驚造化縱奇險水陡山勢狹昨者西興
來烏篷坐一葉水光風碾平山態雨皴濕鏡湖雖半菱
清徹影可揖秦望雖不高翠微足欲踏木木自成趣山
雲更相疊南塘北塘間東江西江接樓閣人煙分簫鼓
畫船合疎密費排弄遠近俱妥貼言登會稽頂試傍禹
穴立山水一氣來玉帛萬國執頓使精神揚不令心膽
懾君家異槩中山木繞閭闔太湖通洞庭地底暗噓吸
萬壑實高峻水面撐千級如我在蜀時畏險不敢習祖
生先著鞭渡江宰名邑愛尋快閣登時鼓剡溪楫饒眼

看未飽臥遊意方愜王郎老畫師千里尺幅恰作畫不
必似此中有詩法君本耽吟人雲煙任吐納中年絲竹
情肯讓謝安挾東山勝蘭亭願慰蒼生答

梁素園方伯

敦懷

以招安圖見示爲題長句

教匪之禍有餘痛端倪略悉不敢誦
內庫帑金坐此耗三省民命是誰送
二十年後招驚魂七千里外憶噩
夢豈有直筆稱詩史願借君圖爲世重
往者天狗未噬吞就縛馴擾如伏狔
屠刀不殺鞭箠打脂膏雖腴性命
存化作狹獠不受制磨牙吮血東西
川張角無奈稱黃巾鴻儒詎是真白
蓮衝梯未習城爭下揭竿纔起兵先
奔揚舲竟過瞿唐峽返轡又出葭萌
關其時守土三縣

令鼎力岷嶓萬山間一稱善守一善戰方梁山積與張

壁山

人龍

公兼戰守介其際雲陽入載籌全計殺之不

盡戰徒勞守雖有餘賊益熾化賊爲民師張詠反側自

安讀漢志巍巍十丈招降旗一麾賢於十萬師藍號白

號仗皆放不戰不守功尤奇羽翼解散鴟鴞因爪牙去

盡狼虎悲單車造壘俘王去

劉青天說賊而王三槐投首

萬馬陷田擒冉

歸冉添元馬陷稻田爲德泰贊所擒

高馬遠避楊無敵

高三馬五負竭寧羌山中爲楊軍門遇春設伏誘致而獲

之巖谷誰收唐賽兒

齊王氏爲官兵所通墮岩死

賊氛淨掃數千里戰勝

攻捷誰所基賊平我公鬚髮白迢迢溟海作方伯酬庸

深感

上皇恩放歸纔卸老臣責天馬騰空暫受羈

桀鶴出籠今自適我生下里知公名公還珂鄉與我覲

圖中之記我初讀

公自記其招安大股賊匪張長春王國賢事甚悉

圖外之意人誰識

卷圖欲去還徬徨掀髯戟指聲琅琅賊之烏合初易滅
團兵已募待披猖其後環圍不敢戰聯騎銜轡逸車箱

公云賊之初起一鼓可滅觀察某以業經招募萬餘鄉勇難于開鎗所言遂致橫不可制嗣一大帥圍賊于方山坪不敢攻滅賊得以物與民易糧而食遂棄間逃去官兵不知猶坐守之已而烏噪其募趨視則已間無一人坐此二端失機事殺刼幾

如入大王賊黨不復知畏忌燈宴偷渡嘉陵江

賊之渡嘉陵江也以

正月十五日偽作龍燈會而來防江兵方縱觀間而賊已捨筏矣

勦撫兼施本

廟算桑榆收

功在疆場此語非公不敢道此圖非公不克當此詩非
我不能作痛定思痛心茫茫

越中逢徐立三副守

鼎

卽送旋蜀

廓喀操戈西極西冰天橫壓斗星低

藏衛以西不見北斗

無端佛國

遭魔劫

乾隆五十七年廓爾喀以貿易爭鮮直犯後藏焚燒佛宇班禪逃至前藏奏請兵援

却賴書生靖鼓

鼙

立三副守時以蜀吏隨福文襄軍常

毳幕迢迢飛露布梭槍解散貢靈犀奇

聞一夜驚談塵懸度繩行夢欲迷

昔日相逢錦官驛兩人同話浙江潮誰知蘭渚流觴會
迴望羗天積雪遙易地宦游空落拓經年鄉夢錯招邀
明春羨煞風帆轉一路看山到笮橋

童二樹山人猶子某以所藏山人梅花畫幅索題

自記此畫失去數年後有友人從粵東買歸云

生小不識童山人并未讀其詩與文隨園傾倒渡江訪
亦頗彷彿知此君千巖萬壑山陰道山人墓門已宿草
零縑賸紙光爛然隨手揮灑皆清老想登嵩高望西湖

此幅作于
客河南時

暗香浮動孤山孤偶然拈筆有神會雲際雪霰

相模糊凌空一枝見筆力中有春氣回槁枯梅借山人

開生面展圖如與山人見二十八字傳家法茫茫造化

任推轉

山人自題云東風取次上層端無數冰花索
笑看悟得有心推轉處始知造物不長寒

桓氏元鳳四言

捷韓家阿買入分擅珍重何異讀父書什襲原如守祖

硯幾時庾嶺梅花神偷取此圖學枝幹蠻煙蜚雨山萬

重鬼神呵護還越中倘非山人靈異在定是猶子精誠

通世間粉本太狼藉燒之裂之不足惜君家寶此勿再

失後代人人心鐵石

餘姚東石敦夫

竟作山陰訪戴人扁舟乘興亦前因訟庭寂寂彈琴未

夜雨瀟瀟剪燭頻詩筆自來推石介酒徒誰復是汪倫
尋常一綫姚江水種得梅花便有春

上虞東李海帆

廉泉十載甘清貧空際立梯招此身老驥伏櫪本知路
饑鷹下韝如有神馬卿偶作挾貲事黃霸曾爲輸粟人
感發風雲志趣在牧羊卜式疑非倫

惺甫夫子奉

命撫閩道出杭州賦呈一首

神聖初御極封疆用耆舊我公踵前烈衣錦當白晝

公原

籍閩之龍巖人先中
丞靜山公曾任閩藩

遺愛追清芬先聲息械鬪旌旗未過浙

故吏爭祇候謂我實門下重之以婚媾寓舍雖湫隘假
榻願再宿蓬華生光輝車馬競填轅兒婦我曾見孫壻

公初觀

公之次孫女與洋第三子進賢締姻此行攜以同來

兩小甫總角跪拜禮誰授拜

起投公懷捫鬚笑相就天性知所依恃愛如習狃兒女
情尚順忠孝理敢繆九命秉圭璋百里待奔走名位雖
懸絕道義頗同臭千仞是積石不爲一拳瘦四海是積
水不爲一滴富氣類妙投合大小莫推究得本窮其變
出手隨所售事公十五年著力不敢驟卓爾纔步趨瞠
乎忽逗遛寸心煎百憂遠到苦難副骯髒七尺軀低頭
愧宇宙公獨憐其志于焉喜邂逅情非姻婭親交忘勢
分陋如撫小兒女語笑許冒詢我詩卽童謠不用苦心
構抒誠無諛詞天籟爲公壽

心知堂詩稿卷十七

成都汪仲洋少海

堤海集上

起辛巳五月迄壬午
四月官海鹽時作

風雨自胥口渡太湖北泊洞庭山已夜半矣

狹港荻蘆盡湖光陡沒天洞庭何處是震澤浩無邊風
力快於翦浪花高過船蒼茫成獨往凌海擬飛仙

禹力至海盡宣防用繇功開山有仙力叱石到湖中移
得洞庭去橫連秦駐東魚鱗兼雁翅疊法問黃公

海鹽縣
石塘法

至前明黃公
光昇始備

海鹽塘上作

潮上猶疑戰鼓聲天風吹淨陣雲橫孫恩死後艨艟散

徐海歸來島嶼平父老能談晉時事蛟龍都避戚家兵
投戈但議安瀾策却要長堤與水爭

祖龍馳道沒鮫宮秦駐猶然峙越東未得鞭山作屏障
更無息壤補鴻濛前朝邑聚驚成水

縣志載舊城已沒海中

大海波

濤怕有風不比杭州潮一綫錢王容易詗彎弓

意仿坡陀制更良縱橫五五石相當魚鱗疊壓迴瀾勢
雁翅分排障海方二百年來忘險要三千水擊又宣防
金堤腹背相依倚著眼還看土備塘

一抹銀濤雪浪堆茫茫何處是蓬萊江東地到鹽官盡
天外潮從日本來濱海自應虞潰決移山底事見疑猜

時赴蘇州購辦石料當事者以有礙風水爲辭

蘇詩句元虛賦不說隄防枉費才

與王竹嶼別駕

名鳳生安
歲發源人

陪撫軍帥仙舟夫子

名永瀛
湖北黃

海履勘海鹽縣海塘作

往者南塘役共問西興渡今爲北塘來同向鹽官路兩
浙濱海區風潮苦奔赴倚公爲長城障海使東去試從
海塘上高誦元虛賦天風翻紫瀾大氣暗吞吐但驗潮
來時不知水盡處迴環含九州雲夢吞無數倘燃牛渚
犀百怪悉呈露蛟龍鼉鼉外堪補水族註祖龍巡會稽
馳道連秦駐鞭山徒妄傳捍海在工作坡陀變疊石縱
橫任指顧累累十八層一氣如鐵鑄上殺而下寬不撓
潮頭怒別有土備塘腹背相迴互昔譬肉傅骨氣脈兩
親附我謂人披甲戰陣足抵禦潮漲排石來土塘內撐

挂潮退吸土去石塘外遮布尤在椿木深不使崇墉仆
左右兩山扼中讓全海注賴此一緩堤九郡得生聚念
自前明來畚鍤厯朝屢石旣苦奔脫土亦遭盪瀦天府
重海防險地親舉步情形辨緩急料物思備具上爲帑
項籌下爲工員慮忠正兼慈惠神靈爲感悟長風卷海
飛現出沙塗護父老欣拜賀佳兆此足據豈知眞識人
不喜亦不懼至誠自昭格全局在施措所恃衆志同金
石輪堅固爭先捐廉俸不必請帑庫九月海水落十月
鼓鼓起煩公督部僚役徒廣招募我雖不諳工竊幸得
參其屹若金堤成潮平海濱淤鉞航接貢使不用防倭

題洪楫谿從戎紀事小照

黑雲壓城城欲傾
文官充將民抽丁
鼓聲不起礮不鳴
縣令翻然辭尉行
尉有生謀令不聽
令有死志誰能撓
死不徒死生眞生
彈丸之邑偏孤撐
父老婦孺皆乘城
堅築壁壘磨欃槍
矢石雨下連灰餅
一賊中創羣賊驚
分縋壯士夜斫營
飛空火彈如流星
藍號白號紛就烹
萬馬踏地雷轟轟
餘賊逸去無畱停
擄掠散落競投誠
撫而縱之使歸耕
功勞至大名心輕
對簿恥與刀筆爭
廣安之戰尤鋒錚
用武須先辨地形
要隘不守徒硜硜
兜鍪何人稱總兵

周桐峰明府

名興嶧四
川涪州人

湖上謁祠圖爲尊甫文恭公

所作三年前自京師郵致囑題今春舟過建德
爲題律詩意有未盡重得七古一章

行年六十猶孺慕湖上謁祠不忍去凄然畫作謁祠圖
選人此去知何處衣衫乍染燕京塵帆檣還指西湖樹
竟叨

先皇格外恩如有神明暗中助公子新現宰官身花縣
近接錢塘渡先人桃李成部民在籍縉紳半親故從今
謁祠無已時不枉作畫屢迴顧春蒸秋禘自湖山憶見
僊聞在卷素千里郵筒索我題三年報命爲公賦詎有
詩筆傳清芬漫借畫圖寫長句志局記纂耆舊傳事實
曾徵周太傅萬里乘槎封島夷三番衣錦題橋柱禁城

騎馬邀榮賜材官守舍蒙 恩護衡文校士遍五都江
右浙西皆兩度越中尚有甘棠愛湖上眞宜肖像塑自
古蜀人例祀浙天生賢哲亦有數君不見敬夫廟背南
屏峰坡翁祠壓西泠路

重到山陰作

自我離山陰夢隔西興渡不意烏篷船重到南塘路湖
波漲夜雨山色霽朝霧似識舊使君迴環相親附咨嗟
有父老歡呼到婦孺使君何處來來當此間住掾吏相
慰藉阜隸競奔赴豈知迴瀾手但欲移山去山移民不
移感此傷情愫

時以採購塘
石渡江云

送別陳心畬夫子

名中孚湖州
北武昌人

按察四川

聖世務得人羣才競感奮有如陽春回萬物生氣振草木紛天喬勾萌胥動震何況賢哲流同時應景運簪組要不愧受任誰如分堂堂陳夫子籍隸江夏郡花韞灑文藻驄馬著聲聞璞剖滇南玉兵弭河東豐

夫子曾充雲南主試任山西河

東移節兩浙來開府四明近山越投戈拜倭奴望風遜

三府十九縣豈必皆賢俊懷德多自愛畏威亦知慎官方既澄敘水利遂疏濬濱海而帶山明州實困頓山水無溝流海潮有路進城市逼衝要屋舍遭汕濕吳相設三喉水則居中鎮事跡久湮沒文獻缺徵信當時錢大令施功只得半夫子一咨嗟萬戶舒懣憤水性鹹淡分地脈陰陽判支河四十五源流自貫串併入一城內衢

巷各通浚頗有屋當衝不得排彼岸知公興大利拆屋
不敢論來從南門宜去是東門便東門凡三喉如人有
吞嚥喉上受清氣喉下隔濁溷奇絕無處尋何以一朝
見至誠有格感百靈皆效順

三喉舊址因鑿地而得

潮水不得入山

水不得竄明鏡涵樓臺飛虹繞里閭畚鍤踰兩年捐貲
至三萬其利迨百世賴公有成算更聞風礪溪萬頃資
輸灌指授纔經始岳牧已交薦移節未渡海銜命將入
棧因公憶桑梓著詩備顧問風俗半秦楚邊徼雜番漢
直道猶忠厚俠骨多壯健劉毅呼盧喜灌夫使酒慣暮
夜探黑丸仇人剗白刃就死尚嬉笑對獄無狡辯亦復
有文秀強半叅狂狷老著太元經早讀范滂傳聰明類

了了伏案少旦旦無限司馬才不得文翁勸夫子往廉
訪多士藉問難洗墨池水黑濯錦江波爛文章得所宗
行詣各無恨學校端根本風俗自改變念自平教匪營
卒頗驕悍李順晝殺人王均夜作亂其魁雖誅夷厥黨
未渙散制府幸賢明謂薛礪堂制軍頻年知忌憚嚴猛思武鄉簡
易記清獻參行二者間治績千古冠離堆灌口山水則
都江堰願公益疏鑿下里普沾潤無以報明德祝熟辦
香瓣

憶夢

丁丑遇挑之前一夕夢人授水圖一幅波立濤
飛不知是河是江是海也水中隱有魚龍百怪

作勢向岸岸上一官長率夫匠築堤又有神人
無數立雲中若護持狀者是年于已挑一等內
再挑河工人員念或應之而不入選已而簽掣
浙江又以爲錢塘江潮當之也及補官海鹽督
辦塘工乃與夢中之境相合是有前定之數賦
長句三十韻

我昔夢有飛仙翩然下玉京示我一幅何處之圖經波
如連山更相觸萬里瀕洞殷雷聲妖露不待燃犀照天
吳蝸象驅水行水勢鼓怒競激薄噓噏攻岸如攻營岸
上何人類官長指揮夫匠與水爭或荷畚鍤挽弓弩膽
氣不懾心至誠忽然一片彩雲橫中有金甲之神明似

奉帝命暗呵護狂瀾手挽還東溟我跪拜受欲研問雞

牕喔喔遽然醒其時河工例挑發同輩顧盼殊自矜既

經入選復出選此人太好邀改更

挑河工日成邸業已入選薦林相國松園尚書云此人大

好遂復邀免

簽掣之江備試用頗謂夢兆真通靈誰知奉使采

塘石謬發議論蒙垂青量材拔暑事已創破格補實

恩非輕塘工要計未諳悉劇邑治理尤難勝比來下車

六十日海塘版築未敢興博考圖經集衆議上奉憲檄

殫吾能頻到勅海廟前立盪冒炭漫潮水騰大氣鹽暖

中有物蜿蜒蟲鼠紛流形磬鼓趣集萬夫力鑿石築土

聲登登彩雲神明不可見風和日朗天宇清世事由來

有前定况乃九郡生靈憑宣防要使水勢縮治獄先在

人心平我無楊黃大才力舉事何能順衆情但將善氣
潛感召斯民直道信有徵海塘和詩數十輩前作海塘詩邑
中和者數十人
觀風文卷三百名父老矜憐子弟愛闔境依依如友生
傳聞始識向來謨洗耳東海不復聽海塘計工兩月成
當與海若歆血盟從此風潮不相值亘萬萬古如金城
以所撰西域志六卷呈松相國得長句一首

往于四川通志局分修職官人物兩志後又獨
編西域考唐書知今之前藏爲吐番建牙之所
至其山川險易道理通塞茫如也繼于成都書
肆中購得相國所著西招圖略一圖一說雖萬
里之外番程蠻徼無不瞭若指掌然後稍知藏

衛門逕叅涉他說遂成卷帙其時省志之例已
塘以東劃爲內地故自察木多敘起由近而遠
迄于外番者所爲體 聖朝懷柔無外之意

相國之書自廓爾喀敘起由遠而近達于內地
者所爲寓萬國梯航恐後之誠體制雖殊其旨
一也顧相國之書皆身親閱歷較諸 仲詳之臆

度鑿空者天淵迥別茲幸相國奉 命而來

而 仲詳適得以負弩之迎效橫經之問此書之
幸不第此生之幸也敬賦長句

昔者眉山蘇次公喜見韓富歐文忠譬之秦岱黃河水
萬古想見開心曾我亦玻璃江上住人生有志羞庸庸

記從束髮到壯歲今之韓富聞我公德望崇高位尊重
不敢爲文求自通青羊市上得圖略指畫西招山萬重
足跡所到手親錄不似書生言鑿空後藏前藏遠而近
巴塘裏塘西至東青稞啖粃吐番俗黃帽梵貝佛國風
皮船擺渡壓波浪碉房比戶如城墉一圖一說遞相接
險易攻守知所從直以兵法遺萬世將相著述真豪雄
熟讀頗識刺薩路志局編纂充書傭定日以内察木外
蠻天萬里開溟濛山川土俗寫荒服恃有鴻寶藏枕中
書成無處質舛繆吾斯未信心如春當時內閣與挑發
幸從清秘瞻儀容二十人中荷賞拔

大挑日成即尚未屬目相
國曰某人好遂入選云釋

褐初邀一命榮糊名中式唱名選其事雖殊感則同負

弩不意逐前導挾書却得投宗工文章事小邊防重願聞扼塞敘西戎

趙菊言吏部隨同松湘浦相國來浙鞫獄放舟迎晤駕湖之上于其歸也復走送之得詩一首

揮手三千里五年音信無肝膽永相託形迹何妨疎不意吳江水忽來使者車往昔結交日年俱弱冠初今茲相晤對鬢鬢均有須鸞膠憶未續兩兩猶鰥夫忽漫相問訊兒女頻呱呱詎我近肥白憐君尚清癯欣聞阿母健拄杖無須扶記得登堂拜屢屢飽行廚平時念往事如思已讀書記否各參半情景費追摹今日是何日把酒傾同壺我昔頗豪飲又愛歌烏烏傲岸不容物清狂

興有餘賴有攻錯益漸使圭稜除自從渡江後落落形
影孤世路苦艱險低頭氣不舒勉強成積慣居然非故
吾曲誤不敢顧酒香不肯沽惟茲耽吟癖得暇時自娛
因君發逸興再過鴛鴦湖長言復嗟嘆累累如貫珠何
時更相逐持節來此都

題劉默園司馬

名肇紳山
西洪洞人

蠟洋記事圖後

江河萬派注滄溟一氣入神魚排山來積水凌空立蜚
戶遁逃人性與蛟龍狎出沒重洋中不愁錦帆濕波濤
兼兵又冒險誰鼓楫洪洞劉公子孝勇人莫及循陔念
所生渡臺浮一葉孫恩與徐海往者事焚劫伏戎不於
莽乘潮倏分合羣島不敢據氣爲臺灣壓觀察實若翁

盜膽久震懾樓船未奏凱趣歸不肯納勉以事大毋迴
帆撾忽急澎湖甫撥棹蠟洋遇肱篋礮聲殷雷轟箭鏃
飛雨急刀光爍電明殺氣屯雲翕楮被卷海濤懸竿四
面插連船有屏障相恃如城邑裂衣熱兩端儼若繁星
熠破釜碎萬片火鎗暗中執智術夜已窮鋒鋌晝相接
情形驟破露賊衆逾重疊桅木驚中斷餘勢易摧拉死
兵與死水性命眞呼吸云何倉卒中不忍雙鳥繫放鳥
鳥不去似憫枯魚泣飛立帆檣上啾啾豈說法魔劫瞥
見驚勇敢變恒怯彼衆曳戈走更生喜相揖同行四十
人篙師乃義俠

題默園錢塘江紀事圖後

龕山赭山生黃埃南壘沙淤北壘開禪機河莊更鼉子
斷崖中斷如離堆江水欲去不得去潮水欲來不得來
狹路相鬪勇者勝江水反隨潮水回全海之力怒逼迫
浪花飛過嚴陵臺伍相白馬世紀述錢王鐵弩吾疑猜
劉侯自謂經滄海呼舟徑渡無徘徊青山低昂若相迓
乘風破浪何快哉忽復一綫潮頭接舟底萬壑轟晴雷
柔櫓短楫那相敵紛紛驚如枯朽摧人聲潮聲同喧吼
近岸一丈不得泊騰身一躍沙岸頽誰從魚腹奪之出
奇功自古多與儻驚人軼事驚人筆王宰李白俱仙才

圖爲王叔睦所作李
海帆撰記并爲題詩

還君此圖不敢讀潮聲壓夢魂驚回

題王竹嶼通守江聲帆影閣圖

圖爲張船
山太守作

崑崙之陰崑崙陽江河分源非荒唐河自靈查走北戒
江從犁石流朱方穿過繩橋入益部羣山紆迴長江長
灘擁峽束氣不鬯瀾翻湍急勢莫當東出彝陵落平曠
北吞漢沔南瀟湘縱橫跌宕恣所適崎嶇歷盡逢平康
軒波但覺乾坤隘盤渦旋轉聲雷碾朝宗於海未到海
金焦兩點涵茫茫投鞭何人漫侈口敢輕天塹猶濫觴
濫觴羊膊亦此水源流大小誰測量有如丈夫守故我
隨人用舍成行藏時會所值偶流露世俗強欲分低昂
看盡浮漚作砥柱相喻惟有瑯琊王王郎與我隣江住
金陵玉壘遙相望我無揚子一廛宅君有摩詰輞川莊
三間閣子凌雲起堆床貯案皆縹緗讀書著書此閣內

揮塵風流疇頽頽開牕六朝帆影舊欹枕萬里江聲涼
飢驅忽索長安米夢裏登樓心徜徉老船之畫是詩筆
著紙輒作蛟龍翔何時尺幅寫江閣令君展畫如還鄉
自從甲子到壬午袖攜此卷來餘杭閒曹冷宦甫受事
當時黑頭今鬢蒼薄俸未足償酒債賣閣將欲充飢腸

作與云此間
行擬售人矣

卽事傷君意蕭瑟開圖喜我神飛揚當今

聖人握金鏡照徹九有搜賢良韓范接踵持節鉞沆旦
同心登廟堂蒲車到處招巢許圭封不次酬龔黃

朝廷清明仕路廣人心鼓舞道氣昌譬彼衆流注江水
穢濁滌淨生榮光君才本是渡江楫安得繫纜拋鳴榔
揚帆會有順風作蒼生渡盡稱慈航却願急流能勇退

歸贖閣子鍾山旁江聲無恙帆影轉省憶作詩人姓汪

戲調孫小峰縣尉

名王潞江
南興化人

江左孫郎氣笑兀職分雖小肝腸熱竟欲隻手活民命
與我同心障海溢漫漫海水鹽官東潮頭高於城中室
試登秦駐棹首望兩岸堤塘只一髮去年大府籌宣防
驅山鞭石補塏穴大汛潮頭始見底一月但得十二日
每日惟俟潮退時搶險工夫不容瞥梅花馬牙椿深深
五縱五橫石屹屹坦水周遭護根基鐵錠鉤連慮滑脫
油灰米汁相彌縫外防潮入內土出衝寒記立積雪中
踏泥又過春雨節邇來赤日燒火雲流汗霑衣不肯歇
海風吹毒如染人染得孫郎面似鐵夫匠畚鍤偶不當

叱咤雷霆起，吻舌卓薦猶未報勞苦。雅謔聊堪博笑悅，君不見典史樣塘前代工祠堂擬祀吳允隆。

舟行遇順風作

船尾不搖櫓，船頭不打槳。一葉乘長風，破浪浪花響。迴顧秋水清，倒影見五兩。有若橫飛雲，變作截江網。懸知層波下蛟鱷，潛悒怏推篷望兩岸。過眼紛林莽，彷彿逍遙游。大有出塵想，轉念忽不快。來船逆風上。

陳午垣同年由庶常改知福鼎縣事紆道見訪詩以送之

蘭蕙同幽香，松柏有本性。豈乏閒草木，不得與之並疇。令子及我墮地生，同命涪水通錦江。地脈非徑庭，弱冠

登賢書榜花燦相映頻年試禮部雲梯苦蹭蹬連袂荷
挑發共作之江令

作令非初心居卑緣爲貧我獨渡江去君爲過夏人銳
志不肯挫騰身如有神誰知到蓬閬又復來風塵食祿
雖故我文章氣已申不教卿慙長世爲百里臣微惜亨
鮮地兩浙換八閩

閩俗善讀書興學自朱子如何勇無禮械鬪今未已我
聞福鼎地近接平陽鄙其民雜閩甌樸直頗易理家傳
有治譜循良更後起彈琴戒高雅栽花惜麗靡民安我
亦安居官樂無比

不解居官樂纔知作吏難隨事省微渺民命之所關如

何說臥治但結清淨緣嗜好苟未絕戴星亦徒然方寸
不空潔何由辨僞奸願君順義命結習都除捐試讀循
吏傳豈必詞臣傳

寄呈相國松湘浦夫子卽壽八秩之慶

伊古聖主聖厥有良臣良我朝旣龍躍羣輔如雲

翔上都重台吉左校多名王魏氏拓跋貴遼家耶律

昌宗支盡奕奕元老尤堂堂治績鄂相最軍謀阿公

長鄂文端公阿繼踵兼文武何人堪頡頏聞見略相證惟公

實克當往者達州境奸民潛撞塘假佛誑施舍金錢求

周憶吏役得利便官長同聾盲養癰遂潰決流毒紛纒

槍桓桓膺簡命膂力公方剛開府潼關內麾軍沔

水陽卷甲趨子午環營圍車箱扼要賊勢蹙乘機兵威
倡膚功草露布凱唱朝天閭

高廟賞雄略西域資料量玉門更萬里伊犁開遐荒天

山雪凜凜翰海沙茫茫貝勒受約束弓民無寇攘屯田

牧馬事羣幕羶城鄉將軍乏衾褥戰士餘衣裳

觀賞將士夜臥以坐墊爲褥推廣 皇帝德用盡招徠方爰借漢都護更

作唐平章 西藏大招廟前有唐平章以下題名碑喇薩問佛國邏些聞神香黃

帽宗喀教青稞贊普糧迤南班禪境極邊陽布疆其東

爲昌都此路通蜀羌僧番中雜處圖經古不詳脫有意

外變何由 廟算臧圖略勝聚米山川歸奚囊懷柔

不用武攻守在亭鄣 公任住藏大臣時著有西招圖略道里山川悉備餘情助瀟灑韻

語拈鏗鏘

公有西藏紀行詩

記從丹達嶺來過碧雞坊我時尚幼

小竹馬騎道旁纔見還直北又聞下建康江南產財賦

蟻潰愁河防砥柱原非砥狂瀾不敢狂昏墊欣解免飢

寒憫散亡俸錢恤貧乏膏火調序庠

公任兩江總督兼辦河工期恤貧士飢民甚至

長

裘白詩好廣厦杜咏傷豈若見行事寒士相歡慶動輒

數千里在遠猶巖廊乃知真宰相勢位心早忘惟辦至

誠念上贊

主德彰獻替不欺隱諫諍卽賡颺是由

識見遠因之氣骨強同朝賴規正後輩資扶匡當代數

耆舊

三朝此棟梁

堯舜相繼序稷契仍劬勩

傳聞足欽慕想像空慨慷不謂奉

綸音忽復臨餘

杭父老嗟熟客相公思

上皇翠華六巡狩侍從偕鵷行湖山宛如昨 離宮猶

在望淚灑舊鴻雪笑看新風篁維時鹽官吏負弩迎帆

檣憶昔纂蜀志萬卷搜縹緗獨辦康藏衛擲筆心徜徉

西招未閱厯臆度無琳瑯幸得新鴻寶萬里如門牆

四川通志西域一門考核多本西招圖略又憶赴挑選內閣初趨蹌覲面報名後

仿佛識容光相馬不以瘦竟許儕騰驤感激思干謁投

刺羞傍徨丁丑大挑爲公賞收入選豈知夙緣厚一見合蕭薌淋漓大

手筆賜書何煒煌似說生公法免使頑仙疆善轉石有

道不轉石之常慊然息心候止水非沸湯動靜互倚伏

飛躍參行藏獨宗晦菴學匪譚佛老莊

公手書末惟二大字并賜款以仙石爲號

一日公隱几臥醒則語笑自得洋曰公之天機活潑迥如鳶飛魚躍

公曰何謂是活潑地洋未及答公曰朱子云當從此中體認靜字

見道

有定識讞獄無回惶蠹商罪不赦衆商安其綱返旆復

帝命叩別吳江航慰勉語交至特達方珪璋

公臨別諭洋曰

汝不患不顯達然須暫且耐苦

朔風逼殘臘途路多風霜念公衝寒行瓣香

祝未央那知公念我征袍反寄將豈惟一身暖春氣融

肝腸拜嘉感衣被奮袂情激昂

公行至清江賜寄拾刺行衣一件

念自官於

越劇邑治未遑山陰理塵牘堆案復堆床亂絲抽其緒

燦若雲錦張祇是平情得何庸鈎距嘗

洋前署山陰數月審結積案七百餘起

大府籌海患蠹測容諮商

聖恩感破格塘工擔保

障

洋棠撫軍帥仙舟夫子奏請披補海鹽以辦要工遂蒙俞允

縣當潮汐衝直對東西洋縱

橫用疊石舊制餘王黃

前明海患最甚知縣王璽僉事黃光昇修塘講縱橫之法獨備

版築趁

潮落搶險礮鼓鏜

現在所辦要工當海水最衝處地形低窪雖隆冬潮水猶能沒石十六七層拆卸到底釘椿砌石俱

是乘潮退時
檢險施工

清宴逢

盛世鏡海波不揚
篋中有虎字珍

愛猶甘棠待棟豐碑勒鎮此魚鱗塘藉公英毅氣壓彼

蛟鱷僵

公所書石摩挲大虎字刻石杭州撫軍有跋
杭人以辟邪甚爲現擬于海塘照刻一通云

側聞開八秩台

星高炳烺精神倍矍鑠鬢髮還青蒼自有長生德無須

九節菖未得飛鳧焉何以効篋篋敷陳二百句用代躋

堂觥

心知堂詩稿卷十八

成都汪仲洋少海

堤海集下

起壬午五月迄甲申七月官海鹽時作

塘工落成詩以紀事

我無迴瀾手掇取補天石危塘捍大海何由弭其隙昨
夏捧檄來記作開山客一葉入太湖風濤蹈叵測諸峰
七十二愚公移不得

初赴太湖采買金焦龜山諸石以價昂中止

迴渡羅刹江羊山

望崩劣父老認使君許鑿一萬尺源源隔海運助我要

工亟要工廠有要觀察預籌畫兩度覽形勢緩急辨衝

僻

林少穆觀察兩度臨塘分定最要工二十六丈五尺即今所辦朝垂章愛四號工段是也次要工共七十餘丈歸入歲修依次分辦云

夫

工及料物成算備稽覈上以獻贊議下以馳飛檄羣言

黃僉事後身續前績

前明黃簽事光昇晉江人築塘備講縱橫之法公亦以閩人臨塘邑中故有此喻

指

授各了了循陔忽辭職公去吾何賴遵守備警惕有請

恒見許知遇撫軍特但飭工築堅毋虞經費劇規方而

砥平層層要如式砌塘良艱苦拆塘更險仄潮來恒滿

塘潮退不露磧惟當兩大汛塘脚暫時覲

每月惟初一後五日十四後五日潮

退露出塘脚然約炊時許潮又復來也

搶險簽樁木木長時太迫

舊樁僅五六尺疎落可數今皆一丈

二尺離用馬牙梅花特法幾于無隙矣

潮水日日來但恃土塘隔脫有颶風作

豈止一郡厄惴惴堤海心似有至誠格簽樁及砌石風

常與潮逆

海上最忌東風駕潮而來否則無碍

石料雖平正石縫苦搜剔潮水

一綫入激蕩厥有力久則拔石出金堤遂圯裂沈思賴

掾吏彌縫妙無迹石罅雖彌縫石勢虞蕩析鐵錫鈎其

橫鐵錠聯其直融結成一氣屹立豎堅壁餘石不適用
棄之殊可惜砌作坦水壩塘根不受擊壩外盪浪椿奮
銳先挫敵土塘實後勁培築去瓦礫孟冬徂仲夏甫得
竣斯役工築雖不多要隘已持搯願如秦駐山與海無
終極

督工海上苦無憩息之所忽于勅海廟側披草萊
得碑碣知爲宴思堂舊基瀕河地隘命工畚土
培之建堂三楹易宴作晏擇前代有功于海塘
者祀之

海風吹瘴毒中人輒入骨開工冒霜雪竣事當暑暍我
質最柔脆臥病已兩月廣文差清健

褚北溟
運親

遲日乃稱疾

縣尉實壯士

孫小峰王路

倔強不少輟最後始求醫亦復苦內

熱團團一青蓋相對二百日力與蛟龍爭焉得不疲茶

披草得舊碑建堂祀前哲所貴先事謀非徒備休歇

於晏思堂前剏立樓屋啟牕四望目吞全海而塘

堤紆迴亦可覽其當潮緩急也名之曰障海樓

巖上鯨魚背不到蓬萊山飛樓結縹緲隔海招羣仙拍

手笑祖龍幾時徐福還南游駐秦駐馳道相鈎連如何

鞭山走不障溟渤邊夸詐變妄誕世俗猶相傳豈若黃

僉事疊石堤武原七郡得屏障兩省資安全萬事貴徵

實著手方知難欲登障海樓試讀堤海篇

澈浦

城頭鼓角驚棲鴉城外荻蘆開白花
海色常浮畫閣上山光遠帶疎籬
斜乘潮水母暗投網刮滷鹽田晴曬沙
欲向鷹窠頂上立重輪夜半看朝霞

正月十九夜邀集邑中紳耆于障海樓上補元宵

卽事成詩呈任秋湄學博

名宗延邑人

昔在六橋三竺間預借元宵淳祐年我翻舊例添佳話
今補元宵東海邊海上金堤五色石珠簾捲起樓百尺
歌板前後聲相和花燈左右影爭射花燈來從不夜城
翦采爲龍雲氣生蟠拏有勢欲飛動一鱗一爪流光明
蹣跚么麼繁水族龜黿蝦蟹蚌螺鰲山巍然戴百戲
幻影狡獪不可捉大鼓如雷煙盒來萬人頭面一時回

長繩拽入半空裏初猶一綫火星起須臾迸散瑤光精
珠璣錯落纓絡橫颺車百輛羽輪轉羣仙飛下白玉京
或乘采鳳控元鶴或驂緋虬騎赤鯨一聲爆竹一輪月
無數飛月空中行百道燭龍抱月走照海不數蜺脂燈
鈞天雅樂誰解奏董雙成璈王子笙是時天公大歡喜
玉戲與人鬪嬉子罡風不作同雲迷雪花亂落人不知
忽從萬盞燈光內時見六出天葩垂玉屑欲砌星橋路
瓊花添開火樹枝情景奇妙畫不得白髮詩人興尤劇
謂彼十洲三島羣仙人下及水府百怪衆波臣此
夜驚詫雜歆羨繁華合讓人間春魚龍曼衍彈指見愧
若戴殼負甲不能神樓臺佳麗從地起不似洞天縹渺

鑿空論蓬壺閬苑此卽是請志開闢從使君我聞斯言
再拜手管領山海羞官守百里苦瘠備徵稅終歲勤勞
念猷猷絕少歡娛不鼓盪或恐幽憂致災咎欲將韻事
舒羣情暫借佳節開笑口宰官慙愧貧如民雖費俸錢
事亦偶今秋定得豐年玉明春更斟勞民酒海塘燈火
成故實登樓還爲父老壽

雪後望海外諸山

蓬萊只在東海東羣仙會聚蓬萊中不許人間隔海見
詩頭亂湧雲濛濛昨夜九天同雲同霰光射入鮫人宮
剛風卷雪壓潮落海氣下縮煙雲空神山縹緲撤屏障
哭兀露出飛來峰誰料渤澥作池沼種此萬丈青芙蓉

但見清冷逼人處上有積素堆玲瓏斜陽照耀嵐影動
忽地表裏皆明通此時注目更奇變往往皎潔生微紅
十洲三島亦人境偶爲荒遠無游蹤試弄扁舟問彼岸
不信真有迴帆風徐福三千童男女開國海外稱秦封
東巡日待不死藥癡絕可憐羸祖龍何似詩人掃妄誕
繪畫靈境殊凡工碧天如洗日初落山雪漸淡煙漸濃

送外弟朱鐵橋

興還蜀

我昔作齊贅君家畱五年中間偶遠別計日仍言旋四
月浣花節初秋乞巧天團樂足娛樂那知人事艱有官
不肯就世少如君賢不第還筮仕人誰憐我貧我旣渡
江後阿姊隨出川君因母念姊更買下峽船往者荷鍾

愛不許離膝前今爲省同氣飛過千里灘兩度聽臘鼓
守歲東海邊相聚豈不久匆匆未盡歡勒獄夜對簿築
塘朝出門雖復同居處不得稍周旋忽地欲歸去忍淚
心含酸君有五色筆天授非人傳爲作出棧圖寫生如
欲言峰巒壓閣道藤蘿纏雲煙足跡所未到神悟由精
專將身入畫去返轡尋劍關驢背摩羣峭半是意中山
北棧接南棧鳥道何盤盤一驛作一圖處處生面新圖
成附驛使遠寄不得慳慰我鄉思苦省圖時驟然

送外弟朱松門集還蜀

阿母前年死惟汝身在蜀兩兄畏姊知不敢放聲哭因
我事牽制伯留仲獨歸與汝議窀穸合葬城南陞仲留

汝出峽送江直到海阿姊問阿母詭語猶好在對面笑
口開背面悲心摧誰知仲氏訃忽又飛空來家中餘何
人寡婦及幼子迢迢隔山川倉皇束行李阿姊怪問狀
伯也惟低頭賴汝誑詐捷但懷離別愁昨日飲泣來今
日含淚去可憐肝腸斷不得據情語而我旁太息方寸
無主張不告意良苦不知尤可傷汝旣給汝姊我亦欺
我婦催促裁寒衣秋來寄阿母

宋梅生夫子由豫章來浙以水流雲在之圖索題

長句

公昔身騎我眉雲海雲手鑿青衣大渡之江水十年功
成辭漢嘉桂管驂鸞衣繡豸湘灘之水蒼梧雲變化動

盪隨使君抽身忽返白鹿洞講學有似文公文前年游
興太奇絕芒屨踏雲探禹穴今年游興何清閒扁舟棹
水登秦山江南兩度訪門客老筆新詩紀游迹障海樓
頭聽海潮南坐北坐風雨驕却從新霽更登覽碧海無
際天迢迢酒酣耳熱掀髯笑袖示圖卷何精妙水流雲
在杜陵句千載前爲公寫照披圖未竟心情然還山雲
是出山泉卽今餘潤遍梁粵分支別派猶成川如何迴
流作止水不灌人間禾稻田往者分陰庇孤露慈雲展
盡清涼天安得好風吹出岫更灑霖雨滋大千卷圖再
拜還徙倚我欲隨公到栗里南阜煙嵐認前身西江波
濤看後起

永安湖歌寄朱笠漁秀才吳蓉渠孝廉

彩虹橫挂明月裏繞月飛雲飛不起雲化爲山虹化堤
月是南湖北湖水何人引湖初灌田湖口置閘潄洩便
琉璃鑿破沆瀣出七十二浜何渺然繞甸穿塍隱復見
匯流下注勢忽斷分宣旁有張老閘橫攔正賴孫家堰
水旱無憂歲有秋膏腴之產人爭謀不識西湖去葑草
但解南畝歌甌窶貪恃天功惜人力六十年來失水則
湖身漸高堤漸低溝澮交流牛淤塞去年南鄉苦旱乾
湖田車戽亦艱難雖邀餘潤出天幸當遵成法籌萬全
我循海岸來湖上咨詢父老但惆悵幸逢高士朱與吳
募捐董役得憑仗從來豪傑不虛生識膽兼擅功廼成

舉事能興百年利成功難讓千古名鳩工聞有舊章在
擊鼓一聲氣百倍餘力願及城長河澈浦田原亦灌漑
湖水歧爲七十二浜其總匯下游爲孫家壩
由堰溢出爲澈浦城長河灌田亦數千畝云

苦雨

去年苦旱乾今年苦淫雨潺湲自夏初滴瀝到夏五初
恐頭蠶僵繼憂二麥腐今念秧鍼短未卽分畦樹有客
來越川近事述覩縷洞啟三江閘積水不得吐又聞嚴
州山潛蛟陡跋扈裂山湧水來吞噬到平楚近者太湖
溢浙西少乾土江豚跋浪來漂沒誰能禦去岸尺有咫
武原幸膺膺誰言地一撮抵得天未補何堪黑蜩飛更
值商羊舞南坐北坐中風潮挾雨怒潮頭高過塘風聲

猛撼戶舊塘如亂雲崩壞難計數新塘如奇兵犄角猶
撐拄潮聲歸尾閭雨氣餘柱礎仰見屋漏痕時聞簷溜
語閉陰而迂陽稽首羣物祖中天露景光預照沈溺苦

煙雨樓

謝除依傍影清孤百尺樓臺四面湖游客頻來倚欄檻
擢歌時復出菰蒲波光澹石煙閑合樹色空濛雨有無
傲對西冷三百里曾邀天藻繪蓬壺

和次譚梅丞

錫洪江西
南豐人

見贈原韻

游蹤半月遍吳越向日交情聯尹班花氣撩來邗上月
湖光盪出浙西山卑官似我疑同隱好客如君忍放還
借索新詩開舊畫依稀認取少年顏

時以出棧圖
索梅丞補題

回頭往事付談餘歲月真如下坂車偶耗壯心還顧曲
儘繁離思不裁書三山會見誇凌海百里何堪說得興
一笑此行翻舊案老夫牽帥曳征裾

時伴梅生
夫子而來

乍浦

潮勢讓山山讓城城連山翠壓潮平鉞航遠泛倭奴國
鐵騎常屯色目兵天外紫銅充鼓鑄古來滄海費經營
蛟龍水底知多少膽落防邊刁斗聲

晴雲

雪嶺橫飛如欲墮玉山林立忽頽然無人畫取晴雲影
讓與清風送上天

次韻答鮑覺生學士

蘇松九郡賴堤防版築原非守一疆銜石粗能學精衛
負山無力報禹彊飛來健語驚潮落早有薪傳在海方
公前游浙時以詩集見貽我比轅駒更僥倖嘶聲萬里動孫陽

七月初二日紀異

雨從昨夜猛風是今朝暴狂飈西北來怒氣生萬竅橫
吹實豪縱回旋更雄驚屋瓦空中飛饑鴟四面叫竹頭
屢拜起桺耆任折撓銀杏勢太孤古柏性獨拘可憐被
摧殘猶自餘兀傲樹木已足惜田畝尤堪悼淫雨五十
日積水尚未耗具區反泛溢三泖失疏導無地堪委輸
滿目是靈潦蘇松半陸沈嘉湖悲遺噍濱海而帶山武
原幸高燥培塿辱水出分稻秧馬鬪秋陽日待曝風災

念不到溝澮生波濤禾苗頗浮漂飛鴻哀欲鳴爲魚憫
誰覺颶風值猖狂潮頭正突冒全海一氣湧隄防任攻
剽蠹穴如偶穿鯨吞那可料在我聽危險爲民力祈禱
傳聞風轉時岸有神燈照其事雖不經厥理足相告東
南稱富庶地土實瘠磽耕或人代牛家無粟藏窖豐熟
畝二石腰鑣人對笑租賦輸其精妻孥食餘糲艱難守
義命貧苦神所勞風威旣少息雨勢勿再瀑低窪失補
救高阜猶稍稍

江蘇按察使林少穆先生寄詠障海樓三十韻次
韻奉答

秦山渡海回湯山冒潮起迴環對鉗束中空數十里九

塗十八岡故跡慨摧靡坡陀改魚鱗原非街增美專精
出神晤奇覩得常理惟公踵前哲不獨工制水引手修
鵬霄低頭奠鼇紀尺寸量舊規指揮定新址咸算握圖
籍百職效官庀椿木排馬牙累石堆雁齒我豈知海防
公真是人砥移節猶眷戀瞻星倍依倚欲誌棠憩處高
樓結迤邐憑闌念始基潮突克攸底歛見垂天龍掉尾
吸海紫撒空作淫潦波濤人城市

夏中海上有三龍自雲端掉尾而下離海面約十許

丈龍尾略擡動海水即山立聲如雷搏龍憑雲而游行無定海水亦隨之旋轉溢湧少頃龍尾沒而水惟一綫白光上挂霄漢矣三日後大雨遂作

乘危海若驕助虐飛廉喜濤頭如山來作勢肆淪毀羣
言聖燈見未致金堤圯驚魂近甫定隻手昔何恃綢繆
賴先事庇蔭不踰咫瀛壖幸屹若雲蜺太旖旎三吳兩

浙間昏墊誰救死捐施有勸導賑撫無流徙懲傲偶執法全活多拜祉在浙惟中丞在吳使君耳端發聞行旌朝覲奉天旨金閭集士庶攀轅固應爾豈識杭湖間亦有還轅擬安得合吳越使節竟雙峙

撫軍仙舟夫子入 覲賦送一百韻

臯夔思贊襄方召秉圭璧體用未兼備謨猷不相借崛起三千年肩任中外職惟

帝則知人我公能報 國東西兩浙間吳越土風隔張弛稍不當恩威兩無益難治匪自今積漸念疇昔爲政在人耳平心事考覈上自監司貴下迄一命辟或破格薦達或據實彈劾或功罪並見或繁簡改易拔十得過

五懲一儆則百是在公生明能使枉者直官方漸澄敘
鹽法須抉剔甲商久盤踞衆商訴掊剋通奸紊課引增
價私封殖薄罰不感戴狂橫肆噬螫讞獄來大臣遣戍
走殊域積蠹一朝去蔀屋無淡食濱海多奧區禁山敢
輕闢南田隔甬東島嶼雜沮澤地較臺灣小土比舟山
堵內控多不便外險無可扼但足供逋逃不堪編版籍
國家計遠大封禁在典冊比聞有老本羣匪聽驅役
私墾收租稅械鬪不休息強梁并寡弱其勢何所極小
利釀大亂衆人昧先識公曰禁之便毋使爲盜賊山峒
欣肅清洋面遠規畫旌旗滿樓船膽氣輸賈舶防維任
廢壞滋蔓忍猜測盧循本非盜徐海慮乘隙軍門忽詔

獄羣弁皆怵惕相顧怯變勇戈船如梭織之江通海處
大地漸開圻銀濤湧胥怒鼓盪聲崩濤如何錢漣留侈
說强弩射海昌固絕險潮頭是橫擊一出鼉子疊萬里
開海色乃有寄奴城窪居天池側湯山秦駐塢左右張
兩翼中權露平曠獨讓滄波拍縱橫變坡陀前代講木
石地誌尋圖經海岸攷陳迹外整而中疎脫壤無堅壁
始嘆盡信書不如身親歷要以一綫塘力與全海敵誠
至可格天著手在務實水害備捍禦水利方采擇修值
黑螟飛宋甞太狂劇陰敷久布攄秋禾傷滋液料民記
戶口澹灾履阡陌蠲緩邀
曠典賑撫懇
殊錫
大發封椿貯停減綱運額開倉抑價糴招商越疆糴金

帶倡解施俸粟散艱阨牧令戒恹懣胥吏絕攬撫雅有
薦紳勸更無義民嗇直從未穫稻算計到捃麥隱隱回
天心源源導地脈湖漚議開淤泖口籌啟塞大勢博羣
議急務快新獲圩岸倘培築經界都對植輶膳園井田
劃畛寓溝洫豐熟從今卜暘雨不差貸凡茲數大端建
樹最鴻碩一害如未除我公意滋感一利猶未興我公
心不憚先憂而後樂豐功本嘉德起家自儒布歷世傳
清白早歲題雁塔乘傳操玉尺司冠三典修天官十銓
飭中台樹冠冕封圻建榮戟倚畀同朝無遭逢
聖主特瘞鹿矢清素還茗非矯激自奉不二味何止去
三惑葛亮開誠心王旦無私客明察洞隱微細過務掩

匿行修多楷模義方有訓迪祿喜逮親養孝能竭子力
張倫偶上饌未聞日扶掖王延缺顯揚但詡謹枕席豈
若備牲鼎烏哺親晨夕鈴閣娛溫清崇褒膺 天勅

家國兩無忝忠孝樹真的持此衡流品何人更人格公
曰才難齊但在心不慝器使隨分量微長亦愛惜賤子
頗怡儼一旦邀拔拭何敢負公委殊未信我克機緘許
意會疑難容面析視猶弟子員不加長官責報稱餘愧
奮量移倍悚慙公今朝 闕庭我未執羈勒捫心實
依依緘口難默默敬祝 明良會遙頌 主臣得
酬庸不改官轉銜當優陟宰相暫迴翔勿令浙民憶

棠憇軒

召伯憇甘棠南巡只偶爾豈若賢撫軍頻年踏海涖旌
麾減前道檐帷不住止輕風隨往還扁舟一葉耳我雖
例負弩受替在伊邇露冕念清德停驂亦古禮適有材
木便何妨役徒起縣有人官房一所久未變價目就揭揭案請改
建爲風神祠所以所餘材木磚石構成此軒及後
山閣治
水龍云使節籌隄防歲一來駐此工築計日新金城巨海
峙十載胼胝勞七郡生靈喜海上險工林立現僅擇要而辦如
其逐段改築非十年不爲功也

依山閣

三十六沙水茫茫九十九峰山蒼蒼山形斷處樓閣起
作勢不許狂瀾撞海岸昔日何披猖盲風吹潮飛過塘
未辨潰決是何處但駭擺蕩聲雷硠海水今年不簸揚
蜿蜿蜒蜒逃深洋凭闌試縱天邊目圓登氣勢堆中央

海水中心蓋天
氣盡吸所致

帆檣隱隱雲濤裏，鉞船如豆時低昂。風景仿

彿蓬萊閣，惜少雄詞驚海王。范公楹帖百年物，淋漓大

筆餘光芒。身坐一卷著勁節，目空千古非虛狂。

范忠貞公
承謨手書

楹帖于涉園樓上云身坐一卷真倨肆
目空千古大波蘭命工摹刻移置閣中

障海依山意，彷彿龍跳虎

臥。重雕裝定見木石，借生氣浪花不敢濺。樓牕永作鎮

固瞰扶桑。

治水航

九有浮元氣，形如治水航。新添小結構，節取大文章。石

疊山雲活，池分海月涼。開牕探島嶼，繞檻坐滄浪。苔蘚

幾時合，芰荷終古香。夢中鼙鼓換，明日赴錢塘。

航甫落成
而于將受

督赴錢
塘云

海鹽留別詩

山海地交錯古來多偉人歷劫流風在文獻備討論譬
彼衆花木一年一度春春氣循環迭花事更番新薄今
而愛古杜陵之所瞋心平眼光正相賞得其真嗟我生
蜀鄙趨趨尠見聞偶爾著鳬舄捧檄來海濱耆舊幸無
恙羣彥紛如雲前草如任我淵朋儕如朱簾雨後進如陳
琴詩諸君不下數十人均見海塘倡和集氣類妙
感合文章迭主賓臨歧念分手何由形影親努力崇令
德交道原通神

地形類仰孟近海反高燥頻年防旱乾昨歲溝淫潦天
意垂警戒常理偶顛倒從來救荒歉豈必待餓殍民窮
無輕灾破格

恩非小

二年旱災三年水災
分司設之各均蒙

特旨准予撫卹

今春久頌
一月口糧皆

曾錫春撰
瑞典也

義舉競感奮推解切懷抱在道無流

亡比尸漸溫飽

城鄉捐賑分坊辦理銀米合
計數踰萬金詳載題名碑中

豆麥今春熟蠶絲

亦倍好天心本仁愛惜我感召少救災雖甚力與患苦
不早猶賴俗風厚忍死不紛擾迴念三年中宰官愧父
老

我無幹濟才意念頗不苟平旦自循省受職虞孤負每
事呼將伯收效賴僚友絃誦士爭奮訓練兵無徂中澤
集飛鴻靜夜無吠狗鱗塘挽海瀾犴獄慎官守凡茲數
大端羣公實著手

謂署廣文諸北溪司訓陳天衢守府朱益堂署
二尹汪雲祥少尹高渭川鹽平汛錢芸若諸人

豈曰小子能掠美以自有念我同心人交道久彌厚未
識一揮袂何處重聚首舊日文讌所變作離亭酒安得

便長醉不解憶誰某

險絕捍海塘三年事畚鍤初猶魂夢驚漸與蛟龍狎過

半葺要工層累何縳獵

自道光元年以來捐工歲修前後辦竣朝垂章受黎首伏周各字號要工共八十六

丈有奇計餘間有字號次要工四十一丈未辦耳

山擡海陲中金城百堵立木石雖無

知檄救生靈刳併力成堅整同心作鎮壓節使揚

天威神姦盡震驚織羅風不動鏡面海熨貼屢驗臨塘

瑞是豈氣候恰

海水溢湧不借風力每遇東風駕控衝突尤甚此其常也惟撫軍仙舟夫子自元年以來四次臨塘皆

值晴霽無風海平如鏡

述職聞還轅沿海應驩洽我本蒙發蹤工築

漸慣習來者更得人勿慮壞成法

害除利不興治功只得半念茲彈丸地形便各自擅濱

海無通川澈浦多古堰九十九峰雨滙貯資輸灌是爲

永安湖相度議開濬費已去年集工待今冬辦此外多
平疇汭港中貫鼎硤石源頭活泖口下流便泖水逼海
潮逆流甦亢旱日久漸淤塞不吐亦不嚙大府議疏鑿
利賴立可見從今歲其有惜我赴他縣

滄海恣變狀樓閣時攀登夜半看日出東望青冥冥紅
霞燒地底海熱濤沸騰摩盪忽擺脫飛空挂銅鉦潮本
隨月漲月亦應潮生水鏡攝海起流影澆太清蛟龍不
得睡窟宅驚光明老蜃吐海市肖物無定形眼角借斜
日往往窮精靈風起煙雲滅蕩蕩天海青

海市每現于日斜
風定時蓋如隙中

望游塵非日光
不能照見也

奇幻此其最念之心屏營何當謝塵網長居

馬嘒城

新陞玉環同知王竹嶼入覲詩以送之

飛騰猶及黑頭公，莫更蹉跎嘆路窮。
早著聲華供物色，誰憐資格困英雄。
毛生小脫錐囊裏，呂相初收夾袋中。
萬里朝天還灑涕，先臣遺笏久塵蒙。

轉銜仍是半沈浮，領取閒曹鎮海陬。
我道使君堪不次，人言當代正旁求。
微聞薦達須陳寵，頗怪遭逢讓馬周。
閭闔九門開詆蕩，試從雲路展驂驪。

名位雖卑宦績多，非徒威惠被嘉禾。
農桑大計頻參與，識膽兼人故不阿。
恨少山川煩指畫，預防暘雨偶偏頗。
天家若問流民狀，莫道哀鴻已作歌。

題鄭雲帆孝廉泰山行旅圖

百萬雷霆關車軸礚礚山石徑犂确瘦骨簸蕩眼花亂
仰見羣峭逼天綠比來回首二十年張霞道上夢魂熟
縈心苦無佳句償展卷忽似舊游續天門誅蕩真宛然
行脚倉皇悔拳跼我已無路踏青雲君尚有緣騎白鹿
明年公車倘北上絕頂請縱天下目閭門匹練更東南
鄉雲一點認金粟七十二代何茫然五大夫松風謾謾
吾輩雅有後彫心如何遭逢讓草木賦頌差敵馬相如
侍從合亞東方朔豈有張說慣占風但似杜陵空望嶽
却願搔首問天處驚人句還貽我讀

題陳琴齋茂才鏡湖垂釣圖

千巖萬壑認蘭亭錯過山陰道上行

予于己卯冬權山陰縣事而琴齋已于癸酉夏隨尊

大父寶摩 誰料栽花來樵李又聞捧硯在淮瀛

辛巳秋之官海鹽而駐齋

隨其尊人雲白同年防河袁浦

麻衣忽灑思親淚畫本還餘念祖情

琴齋畢諱歸里

始得締交并讀圖卷

垂釣鏡湖兒戲事從今須掣海中鯨

跋

汪子少海遊日下早負詩名余未識面則已耳熟之丁丑大挑舉人汪子以一等發浙余時需次杭州昕夕過從論古今詩意歡然相得也既而先後各補官汪子時時以詩寄余余於詩不恒作絀於吏事益不暇爲此誦汪子詩驚賞而已然汪子謬以余知詩者其詩利病常屬余爲之掎摭前年汪子暨余皆坐事罷職將遂舍湖山以歸於是浙東西之喜讀汪子詩者借鈔無虛日或從吏付梓汪子訊余曰子謂何如余曰古人定本率成於晚年盍姑遼緩焉無何汪子迫於客之請竟授梓既竣以示余余瀏覽一過竊歎向者止汪子所以窺於汪

子蓋淺其詩即不盡如古人要自有不敝於天壤者在也。器之有堅脆也，脆者毀而堅者常存，味之有醇醨也，醨者敗而醇者自永，唯詩亦然。顧詩之不即於醨且脆也，匪以其襲積餽飮蹢躅蹇澁云爾也。有穠至之性情，妙遠之識趣，而筆足以匠之，氣足以盎之，學足以昌之，韻足以悠揚之，神骨足以渾化而高翔之，格律聲調雖其小者，然非是不足以成之。往余讀古人詩，蓋時有遇於此焉。今於汪子詩而亦數數遇之也。斯所以爲不敝也。然而汪子方且意嘽嘽以爲吾第得失互存，質諸當世，求指正焉。爾嗟夫汪子之詩如是，其虛受又如是，則其日益也夫，豈獨詩也哉？詩凡十八卷，起少作訖於官。

海鹽他日汪子還蜀將並刻其錢塘以後詩寄余粵中
更當暢然飫余觀焉愧余髮蒼蒼不能如古人五十爲
詩遙與汪子喁于相唱和也所由既卒讀撫卷而三嘆
也道光丁亥三月五日同年生桂林呂璜跋